



Jumat, 13 Oktober 2023
Ogen : Matius 15:21-28



Paguh Ibas Kiniseran



Lit sekalak Moria si nggo cukup metua, 2 anak ipusna, dilaki ras diberu. Sada paksa kenca tamat anakna si diberu bas perguruan tinggi nari, erdahin i bas bas ingan si ndauh. La ndekah ia erdahin, bas sada kecelakaan tunggal, idilo Dibata me anakna ndai. Ceda kal atena. Kenca piga-piga tahun mentas, ingetna denga nge lalap anakna ndai, tapi perban sanga proses ia erceda ate, la ia lupa ertoto ras ngoge Kata Dibata, dungna megegeh ia. Tetap nge sekali-sekali naktak iluhna, tapi si e la ngolangi ia gelah aktif i bas perpulungen, nggit ersaksi i bas tengah kuta ras keluarga. La ipediatna kearun ate nguraki kinijingatenna ras kinitekenna.

Senina Moria, teptep kita lit pergumulenta, tapi lit nge kerina pilihan-pilihenta i bas ndalani geluh enda. Surut ras talu, ntah tetap megenggeng seh kita menang. Nukahen nge surut ras talu, terlebih-lebih putus asa adina kita i bas perbeben. Tapi i bas ogenta sendah kita ipegegehi gelah megenggeng desken diberu i Kanaan nari. I bas paksa sakit anakna, mindo penampat ia man Tuhan. Tapi, tempa nulak Tuhan guna nampati ia. Si e la erbahanca ia surut. Ia tetap meseksek mindo man Tuhan, guna anak si ikelengina e. Perban pemindonna e, bere Tuhan Jesus malem pinakit anakna ndai.

Kisahta banci jadi berbeda ras diberu Kanaan e, pemindonta banci jadi la isehken Tuhan. Tapi perlu si ukuri, labo soal seh ras langna pingko-pingkota, tapi i ja nari kin gegehta ngalaken kiniseran si mbelin e? Ise nge ndia sinampatisa maka amin gia kita terluka tetap ngasup erdahin ras erlayas ukurta? Ia kap e, Tuhan Jesus si erbahan kita tetap paguh bas kiniseran.